

Dithero tsa Tirelano mo Kutlwanong

Thero ka moletlo wa Epifania, e le ka 08. 01. 2012

07/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 225 - 211/219
2. **Thapelo:** Modimo o o se nang tshimologo, le e seng bokhutlo, Rara yo o rategang mo legodimong, re godisa leina la gago le legodimo, le lefatshe, le ditshika tsotlhe di dirilweng ka lona. Re kopa gore lesedi le lentle leo le e leng Jesu re le batle ka metlha, re se boele mo lefifing la lefatshe. O re fe gore re lemoge didirisi tsa bopelothomogi jwa gago tse o re abelang pholoso ka tsona, go tlosiwe kobo ya timelo mo matlhong a rona gore ditshegofatso tsa gago di tie mo go rona ka ene Jesu. Amen
3. Epistolo ka fa thulaganyong ya 2 e kwadilwe mo go Baefeso 3:2-3a. 5-6;
Efangele ka fa thulaganyong ya 1 e kwadilwe mo go Matheo 2:1-12.
4. A go ipolelwe tumelo ya bokeresete!
5. Sefela sa 84 - 78/81
6. Thapelo ya mmadi wa thero.
7. **Epistolo** ka fa thulaganyong ya 4 e kwadilwe mo go

Bakolose 1:24-27, e re: "Jaanong ke itumela mo dipogong tse ke di lo bogelang, ke tlatsa ka nama ya me dipitlagano tsa ga Keresete fa di tlhaeleng teng, ke direla mmele wa gagwe o e leng phuthago e ke diregileng modiredi wa yona ka fa tirong ya Modimo ya go pholosa batho e ke e neilweng go dirafatsa Lefoko la Modimo mo go lona, e bong bosaitsiweng jo bo ntseng bo fitlhegile go tswa metlheng ya bogologolo, mme jaanong bo senoletswe baitshepi ba ona ba Modimo o ratileng go ba itsise se e leng lohomo lwa kgalalelo ya bosaitsiweng joo mo baheitaneng, lo e leng Keresete mo go lona, yo e leng tsholofelo ya kgalalelo." Amen.

8. Thero: Ditsala tse di rategang ta Morena le Mopholosi Jesu Keresete! Ke lo eleletsa moletlo o o tshagofaditsweng thata wa go gopola botsalo jwa Morena, e le moletlo wa Keresemose wa baditšhaba, e bong moletlo wa Epifania, e le moletlo wa ponatshego ya Morena. Modimo o senotswe, e le motho, o senoletswe le baditšhaba. Ka moo ke moletlo wa ba e seng Bajuda, e le moletlo wa me le wa gago, wa go gopola botsalo jwa Morena. Morena le Mopholosi wa rona Jesu Keresete, Morwa yo o tsetsweng a le esi wa ga Rara yo o mo legodimong, o ne a tsalwa ke Maria wa lekgarebe kwa Betleheme mo sebakeng sa ga Kesara Augusteto, e le sa ga Herode le Pontio Pilato. Ke gore pele ga dinyaga tse di 2012. Jesu o ne a robadiwa mo segopong sa dipitse, a phuthilwe ka masela jaaka masea otlhe a a tlhokomelwang ke bommaabo. Le fa go ntse jalo e ne e le Kgosi ya dikgosi, le Morena wa barena, a senolwa, fa e le Modimo o o osi wa nnete - yo o tsetsweng ke Rara pele ga tlhologo. Ke Modimo, o tswa Modimong. Ke Lesedi o tswa Leseding. Ke Modimo wa boammaaruri. O tswa Modimong wa boammaaruri. O tsetswe ga a tlholwa; o bongwe-fela le Rara, mme dilo tsotlhe di tlhodilwe ka ene. - A tsalelwa mo motseng o monnye, e bong Betleheme, e le ngwana wa bahumanegi, e le ngwana wa ga Josefa mmetli wa kwa Nazaretha ka fa molaong, le Maria yo e neng e le lekgarebe le le beeletsweng ke mmetli yoo. Maria o ka re o ne a tlhagelwa ke matlhoko a pele go malatsing a go kwalwa fa go laotsweng ke Augusteto, e sa ntse e le lekgarebe, a ntse a gopola ditsholofetso tsa moengele, o ka re: O ne a ise a tlwaele matshwenyego a pele go, mme a le mo tseleng mo felong fa go sa itsiweng ke ene, go se na ba ga gabo, go se na mmelegisi bosigo gare. O ka re: Maria o ne a tlogelwa fela mo lefifing la bosigo. Ke ka fa go bonalang ka fa thaloganyong ya motho ka teng tse di diragetseng koo, fa Jesu a ne a goroga mo lefatsheng leno la dikhumanego. Mme Efangele e bolela sentle gore re bone pharologanyo e kgolo ya botsalo jwa ga Keresete. Jesu yoo yo o tsaletsweng kwa Betleheme ke ene yo o fologileng kwa magodimong ka ntlha ya rona batho le ka ntlha ya pholoso ya rona, a tlhologa mmele ka Mowa o o Boitshepo mo go Maria wa lekgarebe. Ke ene yo o fetotseng bosigo go nna lesedi, ke yo o fetolang letsatsi le letsatsi go nna moletlo, letsatsi la kgololesego. Ke ene yo o re golotseng mo losong, mo go Satane, mo maleong, le mo bosuleng jotlhe jwa bontshontsho. Ke ka moo, fa moefangedi Johane a kwala, a re: "Lesedi la boammaaruri le setse le phatsima," 1 Joh. 2:8b.

Ka tshenolo ya bopelotlhomogi jwa Modimo dipolelo tsa bogologolo di ne di boloketswe le kwa botlhabatsatsi gore batlhalefi ba gogelwe kwa segopong kwa Betleheme, le fa ba ne ba timediswa pele go fapogela go ya kwa Jerusalema ka ntlha ya diphatsiphatsi tsa kgalalelo ya motse oo, ba gogetswe ka tsholofetso ya Modimo e e kwadilweng ke Miga kwa Betleheme. Ke gore Modimo o ba gogetse mo go Keresete ka Lefoko la ona. Ga latela ka dinyaga le dinyaga morago ga moo gore dikgosi tsa merafe e e farologanyeng di tisetse dineo tse dikgolo mo ngwaneng yo o neng a tsaletswe kwa Betleheme. Naledi e e neng ya phatsima thata ya supa tsela, batlhalefi ba e latela, go ya ba e bone mo godimo ga ntlo, ba bona ngwana, ba wela fa fatshe ba obamela lesea le le tshotseng legodimo le lefatshe mo diatleng tsa lona, ba le ntshetsa dineo, e bong gouta le maswalo le mera. Ba khubama fa pele ga lona le e leng tshimologo le bokhutlo, Morena wa kgalalelo. Morena, o re tlhomoge! Keresete, o re tlhomoge! Morena, o re tlhomoge! Ke thapelo ya bone ba ba ntseng mo lefifing le le khurumetsang lefatshe, mme mo lefifing leo ba senoletswe lesedi la tirafatso ya ditsholofetso tsa bogologolo tsa Modimo, jaaka yona e e leng Epistolo ya bogologolo ya moletlo wa kajeno, e bong Jes. 60:1-6, e e reng: “Tsoga, o sedimogelwe! Gonne lesedi la gago le tsile, mme kgalalelo ya MORENA e go tlhabetse. Gonne bonang, lefifi le khurumeditse lefatshe, le bontsho merafe, mme wena MORENA o tla go tlhabela jaaka letsatsi; kgalalelo ya gagwe e tla bonala mo go wena. Mme baheitane ba tla phuthegela kwa leseding la gago, le dikgosi kwa phatsimong e e go tlhabetse. Tsholetsa matlho, o lebe tikologong: Ba phuthegile botlhe, ba tla kwa go wena. Bomorwao ba tla tswa kwa kgakala, bomorwadio ba tliwa ba ntse mo nokeng. Foo o tla ba bona, o tlala boitumelo, pelo ya gago e tla gakgamala, e tsharologa, fa bontsi jo bo mo lewatleng bo sokologela kwa go wena, fa khumo ya baheitane e tla kwa go wena. Dikammele di tla tlalatlala mo go wena, le dikammelana tsa Midiane le Efa. Bašeba ba tla tla botlhe, ba tliša gouta le maswalo, ba utlwatsa ditiro tse dikgolo tsa MORENA ka boitumelo.” Tlhokomela! Ke se se diragetseng kwa Betleheme fa pele ga segopo sa ga Jesu. Setulo sa bogosi jwa Modimo se senotswe. Aletare e Morwa Modimo o tlhabetsweng mo go yona, le go fisiwa mo loratong lo logolo lwa gagwe e baakanyeditse. Ka moo leba! O tlotle Morena, o obamele Kgosi Jesu Keresete, Morena Modimo wa rona. Re a kopa, re re: Morena, o nne kutlwelobotlhoko ka fa boitlhaolelong jwa gago, jo bo senotsweng, fa o rata gore baditšhaba ba tle, ba ba mo dikhutlong tse nne tsa lefatshe ba tle go amogela boswa jwa botshelo jo bo sa khutleng mmogo le ba morafe wa gago, badumedi ba gago, baheitane e nne barua-boswa, botlhe mmogo le baporofeti le baapostolo ba gago. Ke ka ntlha ya moo, fa moletlo wa ponatshego ya kgalalelo ya ga Keresete, ponatshego, fa Morwa Modimo o senotswe gore ke motho ruri, fa e le motlelo wa boitumelo jo bogolo le mo merafeng ya gaetsho.

Le fa go nte jalo, ga se bagolo ba lefatshe fela, ba ba obamelang mo segopong sa dipitse, le badisa, ba e neng e le badiri ba ba neng ba tshwanetse go dira bosigo, ba ya go obamela Keresete, Morena yo o tsaletsweng mo motseng wa ga Dafita. Baengele ba ne ba ba itsise molaetsa o montle. Ka nako eo ga phatsima kgalalelo ya Morena mo nageng ya Betleheme. Le bahumanegi bao ba ne ba ya go mo obamela. Ba raana, ba re: “A re yeng tlhe kwa Betleheme, re bone selo se, se se dirafetseng, se Morena o se re itsisitseng,” jaaka moengele a ba boleletseng, a re: “Se boifeng; gonne bonang, ke lo tsiseditse mafoko a a molemo a boitumelo jo bogolo jo e tla nnang jwa batho botlhe; ka gonne gompiono lo tsaletswe Mogolodi mo motseng wa ga Dafita, yo e leng Keresete Morena. Mme se e tla nnang sesupo mo go lona ke se: Lo tla fitlhela lesea le phuthilwe ka masela, le letse mo segopong sa dipitse. Ka tshoganyetso bontsi jwa masomo a legodimo jwa nna le moengele, jwa baka Modimo jwa re: ‘Tlotlo a e nne ya Modimo kwa magodimong le kagiso mo lefatsheng mo bathong ba o ba itumelelang.’” Sefela sa baengele e ntse e le karabo ya kereke ya bokeresete mo mafatsheng otlhe, gonne Modimo o o Borarobongwe o utlwile dikopo tsa rona mo ditlalelong tsa rona, di tswa mo mogorogorong wa loso, o sena go re sedifatsetsa lesedi le legolo la pholoso le la botshelo jo bo sa khutleng ka ene Jesu Keresete.

Ke lona lesedi le moitshepi Paulo le ene a filweng go le bona mo go Jesu Keresete - o ka re ka tiego, jaaka a ipoletse, a re: “Morago ga botlhe a iponatsa le mo go nna, ka nna jaaka yo o tsetsweng ka nako e e seng yona,” 1 Bakor. 15:8. Paulo o filwe go dumela mo go Keresete, fa dinyaga di sena go feta, Jesu a setse a bapoletswe mo sefapaanong, le go fitlha, le go tsosiwa mo losong ka letsatsi la boraro, le go tlhatlogela kwa legodimong. O ne a fiwa, fa Jesu a ne a itshenolela mo go ene mo tseleng ya go ya kwa Damaseko, le go kolobediwa ke Anania. Ke fa le ene Paulo a ne a senolelwa bosaitsiweng jo bogolo jwa Modimo, jo bo neng bo fitlhegile dikete tsa dinyaga,

mme bo senoletswe ka Efangele ya ga Keresete mo baitsheping tsa gagwe. Ke bosaitsiweng jwa gore Morwa Modimo a tsalwa go nna motho ruri, fa e le Modimo ruri le motho ruri, fa botsalo jwa gagwe bo diragaletswe pholoso ya rona, gonne jaaka a kopantswe le botshelo jwa rona baleofi, re kopanngwe le ene ka kutlo ya gagwe ya go utlwa go ya losong lwa sefapaano. Ee, tota o ne a sikara maleo otlhe a rona, le a lefatshe lotlhe ka go re bogela matlhokotlhoko a loso ka botlalo. Jalo o re buletse tsela e e yang botshelong, a re naya lesedi go kopana le ene mo phenyong ya gagwe ya go fenywa Satane, boleo le bosula jotlhe. Ke se a se re baakanyeditseng ka go tsenngwa mo losong lwa gagwe ka kolobetso. E bile ke go kopanngwa le thata ya tsogo ya gagwe. Kana mo kolobetsong re kopanngwa le Jesu, re apesiwa ka Keresete, jaaka re apesiwa ka kobo. Ke gona re ipolelang, re re: Re a tshela, mme ga e tlhole e le rona, ke Keresete yo o tshelang mo go rona, mme se re se tshelang jaanong mo nameng re se tshela ka go dumela mo go Morwa Modimo yo o re ratileng, a ba a ineela losong ka ntlha ya rona. Ke gore: Ga re tlhole re tshela boleo, mme Keresete o tshela mo go rona, o re tlišetsa tshiamo le boitsheko fa pele ga Modimo le batho botlhe.

Tseo di mmogo le tiragalo ya malatsi otlhe a go bolaya Atame yo mogologolo yo o mo go rona, a swe mmogo le maleo otlhe, go ya loso lo tla fetsa bosula jotlhe le mo go rona, fa re tloga mo lefatsheng leno. Go ya letsatsing la loso lwa rona tlhabano eo e tla tswela gore go tlhage motho yo mošwa ka malatsi otlhe ka go latela thato ya Modimo. Ke sona se se bolelwang mo Lefokong la thero ya kajeno kwa Paulo a buang teng ka ga dipogo, dipitlagano, go itapisega le tlhabano. Ke tse moapostolo a di bonang mo botshelong jwa gagwe. Wena, modumedi, o tla tshela ka lebaka la eng, o sa tshwenngwe ke tseo, fa moapostolo a tshwanetse go di boga. A wena o tshwanetse go tshegofadiwa mo go kalo gore o se ka wa tlhola wa tshwenngwa ka tseo, o simolole go abelwa kgalalelo ya legodimo? Ga se se Modimo o se go solofeditseng. Maikaelelo a ona ke, fa o ikaelela go re bolokela mo tumelong ka matshwenyego, dipitlagano, le go itapisaga mo lefatsheng leno. Re tlhoka go tlhagisediwa gore re kgaogane le boleo, le ditsela tse di maswe. Re tlhoka go rutiwa ke Modimo go golela mo botlhaleng, go gola ka go dira ditiro tsa lorato le tsa bopelotlhomogi. Bona, Keresete o tshwanetse go gola mo go rona, mme rotlhe mmogo le bosula re tshwanetse go ngotlafala, ka malatsi otlhe. Ke tsa tsela ya botshelo jwa mokeresete. Tsotlhe di mo diatleng tsa ga Keresete gore ene e nne tsotlhe mo matshelong a rona, re tle re tshwane gotlhe-gotlhe le ene. Ka moo jaaka Jesu Keresete a ne a boga tse dintsi, a swela mo sefpaanong mo bofelong, le rona re tla boga, re tla swa re ntse re rwele sefapaano, mme ga re nosi. Keresete o nna le rona, bogolo o mo go rona, a dira ka thata mo go wena le mo go nna gore re golele mo go Keresete, re gorosiwe mo bokhutlong jo Modimo o bo re baakanyeditseng gore re nne se o ratang gore re nne sona ka bopelotlhomogi jwa ona, e bong go nna baitshepi ba ona, ba ba itshwaretsweng maleo otlhe ka bopelotlhomogi, re belegwe ke ona ka lorato le bopelotlhomogi jwa ona, re rotlolediwe ka go solofediwa kgalalelo e re e abetsweng mo kolobetsong, le ka go itshwarelwa thata maleo otlhe a rona ka malatsi otlhe, le go tshegofadiwa, le go gomodiwa, le go alafiwa ke ona ka ntlha ya ga Krisete ka go dumela mo go ene. Ka jalo ene yo e leng Modimo ruri le motho ruri o sa ntse a bonala ka ditiro tse di thata tsa gagwe mo go rona gore le rona re fetolwe, re dirwe bašwa, re nne ba ba tlhabologang tota. Ke ka ntlha ya moo, fa Paulo a itumelela le dipogo tsa gagwe, a tswela go dira tiro ya gagwe go rera Lefoko la Modimo, ka a itse gore tiro ya gagwe ga e direlwe lefela, mme e dirwa go galaletsa Keresete, le tsholofelo ya botshelo jo bo sa khutleng. A kwala a re: Ga re ipoke ka go solofela kgalalelo ya Modimo fela, “e bile re ipoka ka ditlalelo, ka re itse gore tlalelo e dira boitshoko, boitshoko bo dira boikanyego, boikanyego bo dira tsholofelo, mme tsholofelo ga e tlhabise ditlhong; gonne lorato lwa Modimo lo tshetswe mo dipelong tsa rona ka Mowa o o Boitshepo. Amen.

9. **Thapelo:** Morena, Modimo, Rara yo o mo legodimong, kajeno re gopola gore o senoletse baditšhaba Morwao yo o tsetsweng a le esi Jesu Keresete ka naledi e ba e bonyeng kwa botlhabatsatsi, le ka Lefoko la ga Miga le ba le utlwileng. Ke gona re go kopang gore o re fe gore re nne re tsamaye ka metlha mo leseding la baditšhaba le e leng Keresete Morwao, re le sale morago, go ya re le bone mo kgalalelong ya bogosi jwa gago. Re kopa jalo ka ene Morwao Jesu Keresete, Morena, Morepholosi. Amen. Thapelo ya Morena: Rara wa rona yo o mo legodimong ...

10. Sefela sa 81 - 75/78

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. P. P. W. Weber, ka ngwaga wa 2011.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.